



## 細人鐵馬隊

佢記得頭擺做細人个時節，有一陣掙泥毋洗手个細人伴，日日共下讀書共下搞，感情當好，連放學轉屋家也愛相招去麼人屋家共下寫字。該當時，吾爺哀無閒田事，逐日愛到斷烏正有好轉屋，堵好吾下屋个阿明同佢共班，厥姊阿香也同吾哥共班，吾等戴來近，比別個同學感情過較好，放寮日也會共下份家啦，跔阿哥去抓蝦公、釣魚，輒輒搞都毋記得，愛等到阿姆擎竹修來逐，正知好轉。

放寮日阿哥會帶緊吾等共下騎鐵馬寮，對莊頭邊到莊尾，還會滿哪湊人騎鐵馬比賽，阿哥人高腳長、技術又好、膽又在，輒輒打頭名，莊肚个細人做下已服佢。斯恁泥，吾等細人鐵馬隊，有阿哥帶頭，見到禮拜日斯在莊項个大路細巷趕上趕下，較大漢个細人還有法度跔得著阿哥个鐵馬，吾等人矮腳短，躡去大汗拚細汗出，還看毋著阿哥个車屎肚，毋過逐儕還係當愛恁泥跔緊阿哥滿哪寮。

有一擺，禮拜日个下晝，阿哥共樣還帶核歸陣細人鐵馬隊颯過莊項，講愛去挑戰莊尾該條磴崎。該條崎當磴，崎頂有一間伯公，阿哥講使得同鐵馬箭上去个人，正使得參加厥个鐵馬隊，若係箭毋上，愛落來撻鐵馬个，斯愛「淘汰」。雖然吾等這陣細人伴當無把握，毋過還係毋願分阿哥「淘汰」，相賽拚命躡、胚命箭，箭去面紅濟炸、大氣轟天，還係毋肯落來撻鐵馬。真無簡單上到崎頂，歸陣細人在伯公下坐寮，涼凉个山風吹來，實在當舒爽。

等逐儕歇睏好咧，阿哥又帶緊吾等溜崎轉莊肚，阿哥交代(dai`)吾等擋愛撻界緬，慢慢溜崎，毋好貪遽。正開始，愛落恁磴个崎，吾等做下膽膽，正經同擋撻界緬，慢慢、細心細義落崎。無想著，經過阿罇伯婆屋家个時，本本絢在木瓜樹下个大烏狗牯，奮(bin`)開狗鍊逐出來，當惡 hom` hom`滾颯緊過來，牙狴狴像愛咬人个樣，吾等嚇都噉出來，有兩三個細人還跌倒，噉去大嫫聲。阿罇伯婆同厥俵走緊出來，緊喝厥狗也搵手同跌倒个細人、鐵馬牽起來。毋過，吾下屋个阿明噉分狗嚇著，毋記得撻擋，直直撞入山坑肚去。等大人同阿明拉起來个時，阿明嚇都面瀝青(lag` ciang+)，頭那腫一瘰大嫫瘰，手腳做下鑪溜皮，鐵馬也壞撇咧，阿香在脣項驚去緊噉，歸身怙怙顫。

該擺，阿哥分阿爸打都烏青紫黝(eu`)、打都喊毋敢，自該擺過後，細人鐵馬隊自動解散，阿明同阿香也當久毋識過同吾等共下寮，又過半年，厥等搬去豐原戴，斯恁泥無過聯絡咧。

作者：徐姿華

### ☆詞彙學習☆

【掙泥毋洗手】no` ne` m` se` shiu^：玩沙不洗手；形容童年玩伴之間感情很好。

【竹修】zhug^ siu^：細竹枝；是從前常用來教訓小孩的工具。

【趕上趕下】long` shong+ long` ha+：急速的衝過來衝過去。

【胚命箭】poi+ miang` zien`：拚命踩踏。

【伯公下】bag^ gung+ ha+：土地公廟。

【膽膽】dam^ dam^：擔心害怕。

【牙狴狴】nga` sen` sen`：齙牙咧嘴，兇惡的樣子。

【瘰】leu`：頭部因撞擊受傷後而產生的腫塊。

【怙怙顫】gid` gid` zhun+：發抖、顫抖。